

SAN DONA' DI PIAVE

EL VECIO PIOPPO



Fine de un àlbaro d'alto fusto

tempo di lettura: 1'30"

Scrive parché spere in no so cossa... Però prima de 'a me fine voria scivar el me testamento e dar sfogo al me risentimento par sta situazion che la è drio portar a' distruzion del patrimonio arboreo e faunistico.

Son un àlbaro autoctono de circa sessanta ani, portà benissimo e in bona saeute, son alt circa 25 metri e altrettanti ghe n'ò de fronda, ò un fusto drit e 'a me circonferenza supera i 4 metri. Son posizionà a' metà de 'a grava poc prima del ponte de 'a ferovia, e adess son sfiorà dal "Percorso Natura". Inte 'a me vita ò dat ospitaità a tute 'e varietà de osèi che pòpoea 'e grave del Piave, par far el nido, par sostar o ripararse in tute 'e stajon.

Da zóvane son stat testimone dei burci tirài co 'a anzana dai òmeni drio 'a restera fin a Noventa; dopo i é passài al caval o al mul, pì vanti al burcio a motor, e dopo, col progresso... pì gnent, siénzio assoluto, qualche barca de pescadori, o de canotieri che i à 'l inbarcadero pì vanti.

Tute 'e generazion de sandonatesi 'e m'é passàe soto senza quasi acòrzerse de 'a me presenza, e insieme a altre varietà de piante cressù spontaneamente son parte del polmon verde cressù inte i ani. Son stat testimone de tute 'e piene; da ricordar quea del Vajont e quea del 1966.

'L é un periodo che me par che sie rivà 'a me fine: no par maeatia – parché stae benissimo – ma par man del omo co 'a motosega, che, vedendome, sicuramente el dirie: «Sarè un deitto tajar na pianta cussì»; ma so che 'l ordine vien da un dirigente sentà so 'a so scrivania de fòrmica, co tant de Rolex e el Suv sol parchejo, che de "fauna alberifera" no'l capisse

gnent. È pì fazie andar a far legna e distruzar un patrimonio de tuti che risolver i problemi del fiume.

Qua, insieme a altri, me sente rivà al capolinea, no par maeatìa, ripeto, ma par man del omo. Se sa che tut à na fine a sto mondo, ma no cussì. Se proprio à da rivar 'a mia, me piasarìa almanco morir in modo natural, colpìo da un fulmine, e 'a sodisfazion de finir secondo natura.

*Un rispettoso silenzio
dal GROSSO PIOPPO*



